

Акафист святым сорока мученикам Севастийским

Кондак 1

Избранныи страстотерпцы Христовы четыредесяте, во граде Севастийстем чрез огонь и воду прошедшии и в покой вечный вшедшии, песньми восхваляем вас, заступников наших. Вы же, яко имущии велие дерзновение ко Господу, от всяких нас бед свободите, любовьию вам зовущих: Радуйтесь, святии четыредесяте мученицы Севастийстии, преславные чудотворцы.

Икос 1

Ангели Божии, хранители рода человеческого, зряще пред мучителем дерзновенное ваше исповедание Христа, на подвиг страдальческий невидимо вас укрепляху. Мы же ведуще вас, подвиг сей добре совершивших, радостно взываем: Радуйтесь, дерзновенным исповеданием Христа возвеселившие ангелы; Радуйтесь, дивным терпением ваш им мучителей удивившии. Радуйтесь, страдании вашими диавола посрамившии; Радуйтесь, непобедимою силою Христовою противу невидимаго врага вооружившиися и вся злохитрости того на вы и козни победившии. Радуйтесь, неисчетнаго мученическаго лика украшение; Радуйтесь, земныя воинствующия Церкви сильнии помощницы. Радуйтесь, святии четыредесяте мученицы Севастийстии, преславнии чудотворцы.

Кондак 2

Видя зверонравный мучитель веру мучеников, заключи их в темницу, Господь же благоутробный яве посети Своя рабы, похваляя начаток подвига их и увещевая неослабно оный совершити. Яко токмо претерпевый до конца венчается в Царствии Небесном, и сподобляется со ангелы пети: Аллилуиа.

Икос 2

Разум божественный от явльшагося вам Христа приимше, утвердистесь в страдальческом подвиге, святии страстотерпцы, и укоризну Агриколая мучителя в похвалу себе вменисте. Сего ради хвалебно Вам вопием: Радуйтесь, разум правый боговедения стяжавший и волю свою воле Божией всецело предавший; Радуйтесь, вся прелести мирския и славу воинскую ради Христа нивочто вменившии. Радуйтесь, ласканий мучителя не послушавшии и грозных того прещений не убоявшиися; Радуйтесь, темничное заключение ради Христа претерпевшии. Радуйтесь, Спасителем мира во узах посещения, благими словесы от Него утешеннии и на подвиг

укреплении; Радуйтесь, яко с верою Вас почитающих в скорбех утешаете и от бед избавляете. Радуйтесь, святии четыредесяте мученицы Севастийстии, преславнии чудотворцы.

Кондак 3

Сила Вышняго содела Вас, страстотерпцы святии, сильных в слове пред нечестивыми, темже не терпя дерзновения Вашего, гордый мучитель паки в темницу Вас вверже, в нюже радостно текосте, поюще Богу: Аллилуиа.

Икос 3

Имуще, страстотерпцы, в темнице сострадальца вашего Кириона блага себе учителя, укрепляесте в вере Христовой и по днех осмих ведени бывше на судище, безбоязненно предстаете Лисию-князю и Агриколаю-воеводе, мудре обличисте их нечестие. За таковое Ваше дерзновение приносим Вам сицевая хвалы: Радуйтесь, в броню веры Христовой облеченнии и щитом благодати Его покровеннии; Радуйтесь, единого Христа паче всех возлюбившии и ради Его повеления беззаконныя мучителей презревшии. Радуйтесь, силу Христову пред нечестивыми проповедавшии и всемогущество Божие яве показавшии; Радуйтесь, яко и каменная метания Вам не прикасахуся. Радуйтесь, яко та силою Божиею на метающих я возвращахуся; Радуйтесь, яко и ныне молитвами вашими к Богу вражия стрелы от нас отражаете. Радуйтесь, святии четыредесяте мученицы Севастийстии, преславные чудотворцы.

Кондак 4

Бурею злобы противу Христа дыша, гордый Лисий третицею вверже страдальцев в темницу, в нейже паки Христос явися, утешая, ободряя их и нетленные венцы в Царствии Небеснем обещаваая, они же сия слышавше, радостно пояху Богу: Аллилуиа.

Икос 4

Слышавше мучители твердое страстотерпцев Христа исповедание, осудиша я на всенощное в хладнем езере стояние, они же огонь любви божественныя в сердцах имуще, не убояхуся лютаго мраза, но единомудно славяще Бога, идоша на страдание. Мы же, терпению сих чудящися, зовем сице: Радуйтесь, добропобеднии Христовы исповедницы; Радуйтесь, кумирслужения низложителие. Радуйтесь, терпением лютаго мучения в покой вечный вшедшии; Радуйтесь, болезнями страданий обретшии неизреченные блага. Радуйтесь, драже и крепцыи четыредесяте камение; Радуйтесь, Церковь Христову собою

укрепляющие и осиявающие. Радуйтесь, святые сорок мученицы Севастийские, преславные чудотворцы.

Кондак 5

Боготечные звезды Христовы явились святым, в ночном холоде во озере Севастийском сияющим, им же не прельсти теплая баня соблазна, но со ангелы Богу пояху: Аллилуиа.

Икос 5

Видевшие святым, яко един от них отпаде, убоявся мразы ночной, и скрыся в теплой бане и абие умре: тепле взываху ко Господу, да их укрепит в подвиге страдания и прославит имя Свое. Мы же зовем вам сице: Радуйтесь, славные победоносцы, вся козни сопротивных победивши; Радуйтесь, всю ночь нази во озере стоявши. Радуйтесь, единодушно тамо Господа призывавши; Радуйтесь, яко в терпении нашем помощь скорую Господь ниспосла вам. Радуйтесь, яко свет божественный осия вас; Радуйтесь, венцы пресветлы с небесе приявши. Радуйтесь, святые сорок мученицы Севастийские, преславные чудотворцы.

Кондак 6

Проповедницы дивного чудесе, стражники, в бани бывши, поведаша, како в ночи свет небесный во озере облиста мученики, лед растопи, и холод в теплоту преложи, еже слышавше мучителии паче злобою распалыхся, не ведуще Богу пети: Аллилуиа.

Икос 6

Возсиявшу во озере свету небесному, возсия и в сердце единого от стражей благодать Божия, яко той совлекше ризы своя, ввержеша во озеро ко святым мучеником, восполняя место отпадшаго: и тако посрамися князь тьмы, ликовавый о умалении лика страдальцев, им же ныне вопиет таковая: Радуйтесь, Христовы страсотерпцы, молитвами и терпением вашим веселие диавола в печаль обративши; Радуйтесь, от злобы и коварства его верные избавляющие. Радуйтесь, в холоде воды благодатию Святаго Духа просветившиеся; Радуйтесь, стоянием вашим во озере мысленнаго змия главу сокрушивши. Радуйтесь, полная сорок мучениц Христу бодренно представши; Радуйтесь, верою и страданием ради Христа блаженство райское унаследовавши. Радуйтесь, святые сорок мученицы Севастийские, преславные чудотворцы.

Кондак 7

Хотяще чуднии страдальцы веру во Христа непорочно сохранили, славу воинскую и ласкания мучителей нивочтоже вменисте, и вся лютая мучения, аки бесплотнии, притерпесте, поюще Богу: Аллилуиа.

Икос 7

Новое и последнее святии прияша мучение, яко голени их сокрушени млатами быша, и тако скончаша подвиг страдания, прияша от Бога нетленнии венцы. Темже возглашаем в похвалу им сице: Радуйтесь, прекраснии леторасли сада Иисусова, не секирами, но млатом посеченнии; Радуйтесь, сосуды благодати Божией за имя Христово сокрушеннии. Радуйтесь, страдальческий подвиг славно скончавшии; Радуйтесь, от ликов ангельских в сожительство прияты. Радуйтесь, от пророк и апостол, яки тех последователие, прелюбезно сретенные; Радуйтесь, рода христианскаго слава великая. Радуйтесь, святии четыредесяте мученицы Севастийстии, преславнии чудотворцы.

Кондак 8

Странную доблесть показа чудная мать святаго Мелитона, видяще бо телеса мучеников везома на сожжение, своего же сына еще жива суща, взя на рамена своя, и той испусти дух свой Богу, поя: Аллилуиа.

Икос 8

Все зверонравие проявиша мучители, егда повелеша святыя телеса мученик сожещи огнем и прах их в реку воврещи, да истребится от земли память, их, обаче посрамишася; Господь же в роды вечныя прослави я пред ангелы и человеки; сего ради зовем им: Радуйтесь, по словеси псалмопевца, чрез огонь и воду прошедшии; Радуйтесь, страстем Христовым общницы. Радуйтесь, врагов Христа низложителие; Радуйтесь, ко Господу за христианы предстателие. Радуйтесь, верные во правоверии утвердившии; Радуйтесь, неусыпныя молитвенницы за род христианский. Радуйтесь, святии четыредесяте мученицы Севастийстии, преславнии чудотворцы.

Кондак 9

Вси христиане зело удивишася, яко кости святых мученик чудесно ношию в реце яко звезды просияша, и честно собрани, по повелению святых, неоскудныя верным исцеления подают, да поем Богу: Аллилуиа.

Икос 9

Ветия древний пророчески, Божиим Духом озаренный, о кончине верных во псалтири пояше: проидохом сквозе огонь и воду, и извел ны еси в покой; вы же, святии мученицы, делом сие исполниша. Сего ради примите от нас похвалы сицевыя: Радуйтесь, соблюдшии до конца веру Христову; Радуйтесь, страдании вашими, яко злато в горниле, очистившиися. Радуйтесь, предстателие великия к Богу, от бед нас спасающии; Радуйтесь, в скорбех нам помогающии. Радуйтесь, ко спасению душ нас наставляющии; Радуйтесь, святии четыредесяте мученицы Севастийстии, преславнии чудотворцы.

Кондак 10

Спасению нашему споспешницы есте, святии страстотерпцы, темже усердно к вам прибегаем: помозите нам вашим предстательством ко Господу остающее время нашего жития в покаянии проводитьи и всегда благодарно Богу взывати: Аллилуиа.

Икос 10

Стеною молитв ваших оградите нас, святии мученицы, от всяких зол и козней вражих, да охраняеми вами ублажаем вас сице: Радуйтесь, Кирионе, Кандиде и Домне, божественнаго писания наставницы; Радуйтесь, Агнине, Аетие славнии, на Небо духом взлетевшии. Радуйтесь, Афанасие, Аглаие, Вивиане и Горгоние, Христа Бога возлюбившии; Радуйтесь, Екдите, Гаие, Евноикие, Евтихие, Дометиане и Иоанне, души своя за Христа положившии. Радуйтесь, Исихие, Ираклие, Кирилле, Клавдие, Лисимахе и Леонтие, небесная блага получившии; Радуйтесь, Илиане и Илие, пророку Илие поревновавшии. Радуйтесь, святии четыредесяте мученицы Севастийстии, преславнии чудотворцы.

Кондак 11

Пение хвалебное приносим Вам, святии мученицы, яко любве ради Христовы плоти своя не пощадисте. Темже и память Ваша, яко пресветлый светильник в Церкви сияет, верных духом озаряя, поющих Богу: Аллилуиа.

Икос 11

Светом небесным осиянных зрим вас, преславнии страстотерпцы Христовы, престолу бо Пресвятыя Троицы выну предстоите и о мире молитвы со дерзновением приносите: темже хвалебная вам взываем: Радуйтесь, страстотерпцы Христовы Николае, Приске, Смарагде, Сакердоне, Севериане и Сисиние, злобы вражия победителие;

Радуйтесь, Филоктимоне и Феофиле, любве божественныя совершителие. Радуйтесь, Худионе, Ксанфие и Флавие, воины Христовы премудрии; Радуйтесь, Мелитоне, Феодуле и Валенте, раби Бога преславнии. Радуйтесь, Христовы мученицы Валерие, Александре и Акакие; Радуйтесь, весеннею памятию вашею нам весну Христову возвещающии. Радуйтесь, святии четыредесяте мученицы Севастийстии, преславнии чудотворцы.

Кондак 12

Благодатию обильно исполняется обитель Ксиропотамская, имущи честныя останки ваша, преславнии мученицы и чудотворцы, темже и нас память вашу светло совершающих, благодати Божия молитвами вашими исполняйте, да поем чудес подателю Богу: Аллилуиа.

Икос 12

Поюще честная страдания ваша, святии мученицы, прославляем Господа, вас укрепившаго и венцы нетленными венчавшаго, и яко теплых заступников и ходатаев за род христианский, ублажаем сице: Радуйтесь, звезды небесныя от Севастии возсиявшии; Радуйтесь, яко луна духовная, на небо от земли возшедшии. Радуйтесь, яко солнце мысленное, наша скорби просвещаете; Радуйтесь, яко в трудех поста и молитвы нас утешаете. Радуйтесь, четыредесяте крепцыи столпы Христовы Церкви; Радуйтесь, всех верных хранителие и защитницы. Радуйтесь, святии четыредесяте мученицы Севастийстии, преславные чудотворцы.

Кондак 13

О святии стратотерпцы Севастийстии, лести лукаваго славнии победоносцы, предстательством вашим у Господа испросите нам победу на душевредныя страсти и гордость житейскую, да в покаянии поживше, Небеснаго Царствия сподобимся, поюще Богу: Аллилуиа.
(Трижды.)

(Этот кондак читается трижды, затем икос 1 и кондак 1)